

佛說護淨經

失譯人名今附東晉錄

佛往昔共阿難行遇值一池東西四十里南北四十里深四十里池中有蟲其似蝌蚪形黑如墨佛語阿難識此蟲不答言不識佛語阿難此池中蟲者十方世界本衆僧食不淨食墮此臭穢糞屎池中常食不淨五百萬世中受此苦惱竟後復五百世中墮餓狗中常食不淨後墮猪中五百世中復常食不淨復墮蜣螂蟲中常食不淨亦五百世復出爲人常生貧窮家中衣不覆形食不充口常食乾糲糠餅恒饑不足佛語諸比丘有如是者受罪尤苦無量無邊戒語後世末法中諸比丘不可不慎一切衆僧有住止處作不淨食不足住食欲得食者一切白衣食如法著衣持

鉢攝四威儀如法往造是真比丘除其邪命如法活命佛不妄語福報如影響往昔比丘報得阿羅漢果有結業身有便利患向閤上廁見一比丘在廁邊呻吟阿羅漢語是比丘汝本好用意人云何墮餓鬼中呻吟如是餓鬼比丘答言我饑渴來久五百餘年不見漿水正欲趣廁欲食不淨護廁鬼神手捉鐵杖打我不得近廁憶念本曾作比丘知僧淨事貯是用是觸衆僧淨以不淨食飴衆僧故致此殃遇值阿羅漢善知識阿羅漢爲比丘衆中燒香呪願即免餓鬼還復人道誠語諸比丘不可不慎一切不得觸衆僧淨食佛不虛言福報如影響十八地獄經中出罪福此餓鬼從人道中來以不清淨手觸衆僧淨器以不清淨手自觸沙門淨食以不清淨食著沙

當七

六

門淨食中以不淨食飼衆僧故後五百世中墮餓鬼中常食不淨欲趣廁上噉糞屎于時廁神手提鐵杖打餓鬼不得近廁此餓鬼常食膿血食人涕唾及蕩除惡汁常守捕婦女產藏血不淨以爲飲食復經五百世墮猪狗蜣螂中常食臭糞穢不淨受斯苦劇之中累世勤苦數千萬劫無有出期難得解脫痛不可言以不淨手觸男根或手觸女根觸沙門淨器以手觸沙門淨食以不淨食著沙門淨食中以不淨食飼衆僧故致此殃一切人肉眼不知罪福自今已後欲得福祐佐衆僧作食以清淨手提衆僧淨器清淨手淘米乃以淨米著衆僧淨食中得福無量自今已後以此爲常一切衆人普使聞知至心奉行一切檀越施設法會供齋調度持齋者得食不持

齋者不得食此飯一日持齋得六十萬世餘糧不持齋者六十萬世墮餓鬼中何以故此信施難銷故寧吞熱鐵丸不食此飯吞熱鐵丸須臾間耳食信施久受大苦五百萬世中受餓鬼苦諸有設食之處一切如法作齋不得懷挾餘殘食歸給妻子若食此飯若腋底挾擔後五百世常挾熱鐵輪左腋底入從右腋底出一切齋飯不可不慎一米化作熱丸一切賢者施設福會於先嘗啜此食都作殘食唐作此會不如不作何以故諸天不歡鬼神不喜此人於先嘗者亦五百世中受餓鬼苦自今已後欲得福者如法作齋食可得福德諸天歡喜百神慶悅天神擁護經不虛言福報如影響

佛說護淨經